

freystehet / vom Schlagbaum L M. alsdann trehet die Thüre E F. G H. auff ihrer Spindel I K. gar sanfft vmb / biß sie oberzwerch stehet / vnd laufft alsdann das auffgehaltene Wasser auff beyden Seytten der Spindel herauß / vnd verrichtet seine Spülung. Nach diesem / wann die zwo Thüren mit ihren Rahmen auffgestellet sind / alsdann mögen die Schiffe mit stehendem Mastbaum / dardurch fahren.

Hey diesem ist noch zumercken / daß der Lauff des Wassers etwas verhindert wirdt / mit der Rahmen / zwo ober sich stehende Seytten / A D. vnd Q R. sampt der Dicke der zwo Spindel Thüre / die Zwerch offen sind / vnd das Loch der Schleussen vmb so viel verkleinern / als diese Dicke betrifft. Diese Verhinderung kan man vorkommen mit dem Rahmen (wann das Wasser in seinem Lauff ist) gegen den Strom auff zu ziehen / oder auff zu winden / so dann leichtlich geschehen kan // dieweil das Wasser alsdann hinten / vnd vorn in einer Höhe ist.

Den Ursprung aber dieser neuen Invention zu vermelden / ist zu wissen / daß erstlich in der Statt Briel ein Spindelthür gemacht worden / deren ganze vndertheil / so wol vom größten / als vom kleinsten Theil auff einer Sponde / oder Fuge / so in der Rahme gearbeitet / beruhet / welche Spindelthür darumb mit einem Eysern Instrumente auffgewunden wirdt / so hoch / biß sie von der Sponde oder Fuge frey stehet / welches sich in vngefähr drey Daumen belauffet / alsdann kehret sie sich selbst vmb / vnd geußt das Wasser von sich.

Vnd demnach vor diesem / vnd noch in gegenwertiger Zeit vielfältig tractirt wirdt zwischen den Berckmeistern / vnd Zimmerleuten / von spülenden oder raumenden Schleussen / vmb Schiff mit auffstehenden Mast durch zuführen / als hat es sich ebenmessig zugetragen / daß ich von solcher Materi mit Adrian Jans / gewesenem Statmeister von Rotterdam / vnd Cornelis Dirckx Nuys / gewesenem Statmeister zu Delft / in Gespräch gerathen / dieweil nun jeder vnder vns vermeynet / etwas zu solcher Invention dienlich / erdacht zu haben / sind wir vnder einander einig worden / daß ein jeder seine Meynung / vnd Invention offenbaren solte / vnd wo etwas nuhen / oder schadē darauff entstündt / solte ein solches zu gemeinen theilen gerechnet werden / vnd also je einer dem andern behilfflich seyn.

Vnd